

## 1. UVOD

Cilj pisanja ovoga rada jeste da se prikaže na koji način je regulisana nadležnost sa elementom inostranosti u domaćoj zemlji i u Evropskoj uniji, zbog sve prisutnijeg procesa globalizacije i međupovezanosti zemalja, i koji je značaj proučavanja problematike međunarodne nadležnosti.

Jer u današnje vrijeme pravila o međunarodnoj nadležnosti sudova postavljaju granice jednom pravosuđu, određujući onaj krug situacija u kojima jedno pravosuđe ima pravo i dužnost da postupa, i zato što svaka država ima svoja pravila o međunarodnoj nadležnosti.

Zbog mnogobrojnih pravila o međunarodnoj nadležnosti, mi ćemo se u ovom radu prvenstveno baviti analizom međunarodne nadležnosti u našoj zemlji, a zatim i pravilima koja se odnose na međunarodnu nadležnost u Evropskoj uniji.

Međunarodna nadležnost u našoj zemlji je regulisana Zakonom o parničnom postupku (ZPP) i Zakonom o rješavanju sukoba zakona sa propisima drugih zemalja (ZRSZ), a u Evropskoj uniji je regulisana građanskim sporovima koji su riješeni u Briselskoj regulativi o priznavanju i izvršavanju sudskih odluka, odnosno Briselskom konvencijom iz 1968. godine.

Rad će pored uvodnog i zaključnog dijela, sadržavati i sedam temeljnih cijelina o nadležnosti. U prvom dijelu ćemo objasniti šta je nadležnost, koji su osnovni principi regulisanja međunarodne nadležnosti, i koje vrste nadležnosti postoje. U drugom dijelu ćemo se baviti odnosom međunarodne i mjesne nadležnosti, i koje su procesne pretpostavke mjesne nadležnosti. Treće poglavlje se odnosi na regulisanje međunarodne nadležnosti u Bosni i Hercegovini, i na razmatranje odredbi zakona na kojima se ona uređuje, a ti zakoni su Zakon o parničnom postupku (ZPP) i Zakon o rješavanju sukoba zakona sa propisima drugih država (ZRSZ). Četvrto i peto poglavlje će se odnositi na isključivu i konkurentnu nadležnost, odnosno na koji način su regulisani. Šesto poglavlje će se odnositi na međunarodnu litispenciju, a u sedmom dijelu ćemo pokušati da objasnimo na koji način se rješava međunarodna nadležnost u Evropskoj uniji, koja su pravila nadležnosti, na koji način je regulisana saradnja sudova u Evropskoj uniji, i koji je odnos Uredbe 44/2001 i Uredbe 1215/2012.

Za izradu rada ćemo koristiti stručnu i naučnu literaturu, domaće zakonske propise, propise međunarodnih konvencija i dostupni materijal sa Interneta.